



**Komunikadu Imprensa**  
**01 Juñu 2021**

**Komemorasaun Loron Internasionál Labarik :**  
**JSMP kontinua ejize ba Governu atu aseguira protesaun adekuaudu ba labarik sira**  
**iha situasaun pandemia Covid-19 no Dezastre Naturais**

Kada tinan, iha loron 01 Juñu nasaun sira iha mundu tomak komemora loron internasionál ba labarik sira. Loron ne'e sai nu'udar loron ne'ebé nasaun sira iha mundu tomak hatudu sira nia respeitu ba direitu labarik sira hahú husi direitu ba moris, justisa, edukasaun, saude no direitu sira seluk.

Bazeia ba realidade labarik sira iha Timor Leste barak mak sei kontinua hasoru situasaun defisil iha sira nia moris liuliu atu aseguira sira nia direitu asesu ba justisa, edukasaun, saude no mós moris ne'ebé livre husi kualkér violénsia sira hotu.

Durante aplikasaun Estadu Emerjénsia no serka sanitária, alende halo monitorizasaun iha tribunál distritál sira hotu, JSMP mós fó assisténsia legál ba vítima labarik sira ne'ebé mak hetan aktu krime sira hanesan abuzu seksuál no violénsia doméstika no mós kazu sira seluk.

Iha 2020, bazeia ba JSMP ninia monitorizasaun iha tribunál distritál 4, JSMP konsege monitoriza kazu hamutuk 68 ne'ebé envolve vítima labarik husi totál kazu 733 ne'ebé JSMP monitoriza (totál ne'e la representa kazu hotu ne'ebé envolve labarik sira no tribunál julga). Husi totál kazu ne'e hatudu katak labarik barak kontinua sai vítima ba krime sira ho tipu ofensa ba integridade física simples ho natureza VD, abuzu seksuál ba menór, espozisaun ka abandonu no la halotuir obrigasaun alimentár no kuaze iha jurisdisaun tribunál hotu lor-loron julga kazu sira ne'ebé labarik mak sai hanesa vítima.

“Loron 1 Juñu sai nu'udar loron importante ba labarik sira, nune'e husu ba na'in ulun sira hodi haree realidade ne'ebé labarik sira infrenta iha Timor Leste, liu-liu oinsa atu aseguira protesaun adekuaudu ba labarik sira. Estadu tenke iha polítika ida ne'ebé di'ak atu kria kondisaun seguru ba labarik sira iha TL liuliu iha situasaun ne'ebé agora dadaun ita infrenta hela hanesan Covid-19 no mós dezastre naturais ne'ebé akontese

iha fulan Abril ne'ebé lori implikasaun boot ba labarik sira, tanba tenke hela iha fatin refujiadu ho kondisaun ne'ebé mak la seguru to'o labarik balun sai vítima iha fatin refujiadu", dehan Diretora Ezekutiva JSMP, Sra. Ana Paula Marçal.

JSMP rekoñese katak Governu Timor-Leste harii ona unidade ka komisaun balun atu proteje labarik sira, hanesan Seksaun Protesaun no Asisténsia ba Labarik ne'ebé iha Risku Laran no Vítima Abuzu iha Ministériu Solidariedade Sosiál (MSS) (Unidade Protesaun Labarik); Grupu Tráballu kona-ba Protesaun Labarik no Rede Referál Protesaun Labarik; no Komisaun Nasionál Direitu Labarik nian (KNDL). Alende ne'e, Lei Kontra Violénsia Doméstika (LKVD) inklui kompromisu husi Governu atu hasa'e koñesimentu públiku nian kona-ba VD no aumenta asisténsia ba vítima sira.

Mezmu iha ona sistema protesau ba labarik ne'ebé eziste maibé seidak efetivu iha nia implementasaun. Liuliu Governu seidak halo intervensaun efetivu iha tempu ne'ebé apropiadu atu proteje labarik sira husi krime violénsia seksuál liu-liu ho natureza inestu.

Ho situasaun sira ne'e JSMP kontinua rekomenda ba Instituisaun no mós Ministériu relevante sira atu :

- Ministériu Públiku no tribunál presiza halo avaliasaun ba kazu ida-idak tuir ninia natureza no sirkunstánsia sira ho profunda antes formula akuzasaun no fó desizaun, nune'e bele asegura protesau ba labarik sira no prevene krime seluk hasoru labarik.<sup>1</sup>
- Husu ba tribunál atu ba kazu sira ho natureza violénsia seksuál la presija atu konsidera sirkunstánsia atenuantes ekstraordináriu
- Husu ba Prokuradór atu uza artigu spesífiku (155 KP kona-ba maus-tratus ba menór) iha akuzasaun ba kazu ne'ebé envolve labarik hanesan vítima bainhira autór nu'udar ema ne'ebé mak iha responsabilidade hodi tau-matan ba labarik sira tantu família ka ema seluk ne'ebé vítima subordinadu ba no la presiza prova repetisaun.
- Inkorpora krime spesífiku kona-ba inestu iha Kódigu Penál Timor-Leste no aplika la haree husi vítima nia konsentimentu ka idade.
- Governu no Parlamentu Nasionál atu aselera diskusaun ba Esbosu Lei Protesaun labarik ne'ebé kaduka iha terseiru lejislatura até agora

JSMP mós hakarak hatu'o parabens ba labarik sira iha mundu tomak, liu-liu labarik sira iha Timor-Leste ne'ebé komemora loron spesial ba labarik nian no hein katak liuhusi komemorasaun loron mundiál ba labarik ne'e, ema hotu bele hamutuk luta kontra violénsia oioin no diskriminasaun hotu hasoru labarik tanba labarik sira mak futuro nasaun.

---

<sup>1</sup> [https://jsmp.tl/wp-content/uploads/Relatoriu-OJS-2020\\_FINAL.pdf](https://jsmp.tl/wp-content/uploads/Relatoriu-OJS-2020_FINAL.pdf)

Atu hetan informasaun kompletu bele kontaktu:

Ana Paula Marçal

Diretóra Ezekutiva JSMP

Email: [ana@jsmp.tl](mailto:ana@jsmp.tl)

Telefone: 3323883 | 77040735

Website: <http://jsmp.tl/>